



MES 7 19 01692686



10/12/2019

საქართველოს პარლამენტის თავმჯდომარეს,  
ბატონ არჩილ თალაკვაძეს

ბატონო არჩილ,

საქართველოს ზოგადი ადმინისტრაციული კოდექსის 49-ე მუხლის მოთხოვნათა გათვალისწინებით, წარმოგიდგენთ სსიპ - განათლების ხარისხის განვითარების ეროვნული ცენტრის (შემდგომში - ცენტრი) 2019 წლის ანგარიშს საჯარო ინფორმაციის შესახებ, კერძოდ:

ა) საჯარო ინფორმაციის გაცემის მოთხოვნით ცენტრში სულ შემოვიდა 102 განცხადება. საჯარო ინფორმაციაში შესწორების შეტანის თაობაზე მოთხოვნა არ შემოსულა, შესაბამისად, უარის თქმის თაობაზე გადაწყვეტილებაც არ მიღებულა. ამჟამად წარმოებაშია 2 განცხადება.

ბ) საჯარო ინფორმაციის გაცემაზე დაკმაყოფილდა 87 განცხადება. აქედან ნაწილობრივ დაკმაყოფილდა 11 განცხადება, კერძოდ, გაცა ინფორმაციის ის ნაწილი, რომელიც მიეკუთვნებოდა ცენტრის კომპეტენციას. მათ შორის, 5 განმცხადებელს უარი ეთქვა კორესპონდენციის იმ ნაწილის დაკმაყოფილებაზე, რომლითაც მოთხოვნილი ინფორმაცია წარმოადგენდა არა საჯარო ინფორმაციას, არამედ საქართველოს ზოგადი ადმინისტრაციული კოდექსის 99-ე მუხლის პირველი ნაწილით გათვალისწინებულ, უშუალოდ ინდივიდუალური ადმინისტრაციულ-სამართლებრივი აქტის მომზადებასთან დაკავშირებულ, შიდაუწყებრივი ხასიათის დოკუმენტაციას. 4 განმცხადებელს უარი ეთქვა მოთხოვნის იმ ნაწილში, რომელიც სცდებოდა ცენტრის კომპეტენციის ფარგლებს. ასევე, წარმოდგენილი 2 განცხადების ის ნაწილები დარჩა დაუკმაყოფილებელი, რომლითაც მოთხოვნილი იყო არა საჯარო, არამედ პერსონალური ინფორმაცია „პერსონალურ მონაცემთა დაცვის შესახებ“ საქართველოს კანონის შესაბამისად.

საჯარო ინფორმაციის მოთხოვნის დაკმაყოფილებაზე უარი ეთქვა 11 განმცხადებელს, ვინაიდან წარმოდგენილი საკითხების შესახებ ინფორმაციის ფლობა/დამუშავება სრულად სცდებოდა ცენტრის კომპეტენციის ფარგლებს.

ამასთან, 2019 წლის საანგარიშო პერიოდში, ერთ განმცხადებელს ეცნობა, რომ მოთხოვნილი ინფორმაცია არ წარმოადგენდა საქართველოს ზოგადი ადმინისტრაციული კოდექსის მე-2 მუხლის პირველი პუნქტის „მ“ ქვეპუნქტით განსაზღვრულ საჯარო ინფორმაციას, შესაბამისად, მას უარი ეთქვათ მოთხოვნის დაკმაყოფილებაზე.

ასევე, ერთ განმცხადებელს ეთქვა უარი მოთხოვნის დაკმაყოფილებაზე, რადგან კორესპონდენციაში დასმული საკითხი, თავისი არსით, წარმოადგენდა არა საჯარო, არამედ პერსონალური მონაცემების დამუშავებას.

კოლეგიურ საჯარო დაწესებულებას საკუთარი სხდომის დახურვის შესახებ გადაწყვეტილება არ მიუღია.

ამასთან, გაცნობებთ, რომ 2018 წლის 03 იანვარს ცენტრის დირექტორის №03 ბრძანების საფუძველზე, საჯარო ინფორმაციის გაცემასა და პროაქტიულად გამოქვეყნებაზე პასუხისმგებელ პირად განსაზღვრულია ცენტრის სპეციალისტი - ნინო მეგენიშვილი.

გ) რაც შეეხება საჯარო მონაცემთა ბაზების შეგროვების, დამუშავების, შენახვისა და სხვისთვის გადაცემის შესახებ მოთხოვნას, ასევე, პერსონალურ მონაცემთა შეგროვების, დამუშავების, შენახვისა და სხვისთვის გადაცემის თაობაზე ინფორმაციას, მოგახსენებთ შემდეგს:

1. საყოველთაო ჯანდაცვაზე გადასვლის მიზნით გასატარებელ ზოგიერთ ღონისძიებათა შესახებ" საქართველოს მთავრობის 2013 წლის 21 თებერვლის №36 დადგენილების საფუძველზე, სსიპ – სოციალური მომსახურების სააგენტოს ყოველთვიურად, ყოველი თვის პირველ სამუშაო დღეს, აწვდის განახლებულ მონაცემებს წინა თვის ბოლო კალენდარული დღის მდგომარეობით, სტუდენტების შესახებ შეთანხმებული ფორმატით.

2. სს - საქართველოს ბანკს, ქ. თბილისის მუნიციპალიტეტის მერიას, სსიპ - განათლების ხარისხის განვითარების ეროვნულ ცენტრს, შპს - თბილისის სატრანსპორტო კომპანიასა და სსიპ - განათლების მართვის საინფორმაციო სისტემას შორის 2018 წლის 10 ოქტომბერს გაფორმებული ურთიერთშეთანხმების ხელშეკრულების (№24), საფუძველზე დადგენილი წესით ცენტრი აწვდის ინფორმაციას სს - საქართველოს ბანკს, რომლის თანახმადაც შეღავათიანი ან/და უფასო სამგზავრო ტარიფით სამგზავროდ გადახდის შესაბამისი საშუალების - ბარათის მიღება, შეუძლიათ ქალაქ თბილისის ადმინისტრაციულ საზღვრებში განლაგებული ავტორიზებული უმაღლესი საგანმანათლებლო დაწესებულებების სტუდენტებს, რომლებსაც კანონმდებლობით დადგენილი წესით არ აქვთ სტატუსი შეჩერებული ან შეწყვეტილი.

3. სსიპ - სახელმწიფო სერვისების განვითარების სააგენტოს, სსიპ - განათლების ხარისხის განვითარების ეროვნულ ცენტრსა და სსიპ - განათლების მართვის საინფორმაციო სისტემას შორის 2018 წლის 13 მარტს გაფორმებული „მიგრაციის მონაცემთა ერთიანი ანალიტიკური სისტემის მიზნებისათვის მონაცემთა მოცულობის განსაზღვრისა და მიწოდების თაობაზე" (№13) მემორანდუმის საფუძველზე დადგენილი ფორმატით აწვდის სსიპ - სახელმწიფო სერვისების განვითარების სააგენტოს.

4. საქართველოს პრეზიდენტის 2012 წლის 26 ივნისის №507 ბრძანებულების საფუძველზე, ცენტრი უზრუნველყოფს სახელმწიფო სერვისების განვითარების სააგენტოსათვის საგანმანათლებლო დაწესებულებების რეესტრის ხელმისაწვდომობას.

5. გამყოფი ხაზის მიმდებარე სოფლებში დაზარალებული სტუდენტების სწავლის დაფინანსების მინიჭების მიზნით ცენტრი საქართველოს განათლების, მეცნიერების,

კულტურისა და სპორტის სამინისტროს აწვდის ინფორმაციას სტუდენტების სტატუსების, დაწესებულების, პროგრამების სტატუსებისა და სწავლის საფასურის შესახებ.

6. სოციალური პროგრამის ფარგლებში სტუდენტების სწავლის დაფინანსების მინიჭების მიზნით ცენტრი საქართველოს განათლების, მეცნიერების, კულტურისა და სპორტის სამინისტროს აწვდის ინფორმაციას სტუდენტების სტატუსების, დაწესებულების, პროგრამების სტატუსებისა და სწავლის საფასურის შესახებ.

7. უცხო ქვეყნის მოქალაქეებისათვის სწავლის დაფინანსების მინიჭების მიზნით ცენტრი საქართველოს განათლების, მეცნიერების, კულტურისა და სპორტის სამინისტროს აწვდის ინფორმაციას სტუდენტების სტატუსების, დაწესებულების, პროგრამების სტატუსებისა და სწავლის საფასურის შესახებ.

8. მასწავლებლის მომზადების საგანმანათლებლო პროგრამაზე ჩარიცხული პირებისათვის სწავლის დაფინანსების მინიჭების მიზნით ცენტრი საქართველოს განათლების, მეცნიერების, კულტურისა და სპორტის სამინისტროს აწვდის ინფორმაციას მასწავლებლის მომზადების პროგრამაზე ჩარიცხული პირის სახელის, გვარის, პირადი ნომრის, სტატუსების, დაწესებულების, საგანმანათლებლო პროგრამების და სწავლის საფასურის შესახებ.

9. სახელმწიფო სასწავლო/სამაგისტრო გრანტის მფლობელი და პროგრამული დაფინანსების ფარგლებში დასაფინანსებელი სტუდენტების შესახებ ინფორმაციის დამუშავების მიზნით ცენტრი უზრუნველყოფს სსიპ - განათლების მართვის საინფორმაციო სისტემისათვის საგანმანათლებლო დაწესებულებების რეესტრის ხელმისაწვდომობას.

აქვე მოგახსენებთ, რომ 2019 წლის 12 ივლისს, საქართველოს განათლების, მეცნიერების, კულტურისა და სპორტის მინისტრის №145/ნ ბრძანებით ცვლილება განხორციელდა „საგანმანათლებლო დაწესებულებების რეესტრის წარმოების წესის დამტკიცების შესახებ“ (შემდგომში - წესი) საქართველოს განათლებისა და მეცნიერების მინისტრის 2011 წლის 22 ივლისის 127/ნ ბრძანებაში. აღნიშნული წესის პირველი მუხლის მე-3 პუნქტით განისაზღვრა, რომ რეესტრს აწარმოებს საჯარო სამართლის იურიდიული პირი – განათლების მართვის საინფორმაციო სისტემა (შემდგომში - მართვის სისტემა). ამ ცვლილების თანახმად, უმაღლესი საგანმანათლებლო დაწესებულებების რეესტრის წარმოება აღარ განეკუთვნება ცენტრის კომპეტენციას და იგი სრულად გადავიდა მართვის სისტემის ფუნქციაში.

დ) 2019 წლის საანგარიშო პერიოდში ცენტრის 4 თანამშრომლის მიმართ გამოყენებული იქნა დისციპლინური პასუხისმგებლობის ზომა - "შენიშვნა". აქედან 2 მათგანის მიმართ დისციპლინური პასუხისმგებლობის ზომის შეფარდებიდან გასულია 3 თვე, ცენტრის შინაგანაწესის თანახმად, ისინი ამჟამად ითვლებიან დისციპლინური პასუხისმგებლობის არმქონედ. ამ ეტაპისთვის 2 თანამშრომელს აქვს შეფარდებული დისციპლინური პასუხისმგებლობის ზომა - "შენიშვნა".

ე) ცენტრს საჯარო ინფორმაციის გაცემაზე უარის თქმის შესახებ გადაწყვეტილება ასევე, სხდომის დახურვის შესახებ გადაწყვეტილება არ მიუღია (საჯარო ინფორმაციის მოთხოვნის დაკმაყოფილებაზე უარის თქმის მიზეზს წარმოადგენდა სწორედ საჯარო ინფორმაციად არმიჩნევა საქართველოს ზოგადი ადმინისტრაციული კოდექსის მიხედვით, რაც ზემოთ იქნა აღნიშნული). ამდენად, რელევანტური საკანონმდებლო აქტების გამოყენების საჭიროებაც არ დამდგარა.

ვ) საჯარო ინფორმაციის გაცემაზე უარის თქმის შესახებ გადაწყვეტილების სასამართლოში გასაჩივრებას ადგილი არ ჰქონია.

ზ) საჯარო დაწესებულების მიერ ინფორმაციის დამუშავებასა და გაცემასთან დაკავშირებით მიღებული გადაწყვეტილებები არ გასაჩივრებულა, შესაბამისად, გასაჩივრებასთან დაკავშირებულ ხარჯებს, მათ შორის, მხარის სასარგებლოდ თანხის გადახდას, ადგილი არ ჰქონია. ასევე, კოლეგიური საჯარო დაწესებულების სხდომის დახურვის თაობაზე გადაწყვეტილება არ მიღებულა, შესაბამისად, გასაჩივრებასთან დაკავშირებული ხარჯები არ გაწეულა.

პატივისცემით,

სსიპ-განათლების ხარისხის განვითარების ეროვნული  
ცენტრის  
დირექტორის მოვალეობის შემსრულებელი თამარ  
მახარაშვილი

თ. მახარაშვილი